

Rapport dalla sessiun dil cussegl da vischnaunca dils 28-04-2025

Tractanda 1

Approbaziun dil protocol dalla sessiun dils 06-01-2025

Il protocol dalla sessiun dils 6 da schaner 2025 vegn approbaus cun engraziament.

Tractanda 2

Quen communal 2024

- a) Orientaziun e discussiun
- b) Rapport dalla cumissiun da gestiun
- c) Approbaziun da quen e bilanza

Il president communal Dumeni Tomaschett presenta ils puncts impurtonts dil quen communal digl onn 2024 sco suonda:

Il quen da gudogn e sperdita siara cun in surpli d'entradas da frs. 3'049'276.-. Il gudogn avon amortisaziuns (cashflow) munta à frs. 4'882'995.-. Igl ei vegniu investau net frs. 2'014'056.-. Quei munta che la vischnaunca ha saviu cuvierer las investiziuns digl onn 2024 cumpleinamein entras agens mieds. Vinavon ha la vischnaunca giu a disposiziun frs. 2'868'939.- per baghegiar giu deivets. Cun la fin digl onn 2024 ha la vischnaunca da Trun ina facultad netta da frs. 2'049'933.-.

Per la presentaziun dil quen vegn surdau il plaid alla canzlista communal.

Il quen d'investiziuns siara cun expensas totalas da 3'530'163.- milliuns francs ed entradas totalas da frs. 1'516'107.-.

Las grondas posiziuns secloman:

- | | |
|----------------------------------|----------------|
| • Fiasta 600 onns Ligia Grischa | frs. 832'111.- |
| • Sanaziun plaz e mir Nossadunna | frs. 132'038.- |
| • Via Campliun – Caltgadira | frs. 949'933.- |
| • Maschinas communalas | frs. 211'328.- |
| • Via Nadels – Via Rost | frs. 956'849.- |

La presidenta dalla cumissiun da gestiun Alexa Decurtins rapporta davart la lavur dalla cumissiun.

La cumissiun da gestiun ed il biro da revisiun recamondan l'approbaziun dil quen cun engraziar e dar scarica als funcziunaris responsabels ed allas collaboraturas dall'administraziun.

Cun 12 : 0 vuschs approbescha il cussegl da vischnaunca il quen communal digl onn 2024 tenor la proposta dalla cumissiun da gestiun cun resalva dil referendum facultativ.

Tractanda 3

Lescha davart l'indemnizaziun dallas prestaziuns dalla vischnaunca da Trun en connex cul provediment d'electricitad

Il gestiunari dalla reit d'electricitad, oz la Repower SA, paga gia dapi onns alla vischnaunca da Trun ina taxa annuala per far diever dil funs e terren public per la construcziun ed il menaschi dalla reit da distribuziun d'electricitad. La taxa variescha denter 0.2 entochen 2.8 raps per kilowat ura. Las vischnauncas ella Surselva che vegnan provedidas dalla Repower

incasseschon actualmein 1.0 rap per kilowat ura. La lescha federala pil provediment d'electricitad metta peisa sin la trasparenza dils cuosts en connex cul provediment d'electricitad. L'ordinaziun d'energia scriva avon che las taxas per prestaziuns publicas ston vegnir indicadas separadamein sils quens dils consuments finals. Las taxas per prestaziuns publicas ch'ils consuments finals pagan alla communad ston sereferir sin ina basa legala. Ord quei motiv han las vischnauncas dalla Cadi elavurau ils davos onns ina lescha sin palancau communal.

Il cussegl da vischnaunca approbescha cun 12 : 0 vuschs la lescha davart l'indemnisaziun dallas prestaziuns dalla vischnaunca da Trun en connex cul provediment d'electricitad e decida da suttametter quella alla votaziun all'urna (art. 30b constituziun communal).

Tractanda 4 **Elecziuns supplementaras per il rest dalla perioda d'uffeci 2024-2026**

Ils 22 da schaner 2024 ha il cussegl da vischnaunca menau atras las elecziuns per la perioda d'uffeci 2024-2026 tenor artechel 41 dalla constituziun communal. Enconuschentamein ha Erica Cavegn-Pfister bandunau la suprastanza communal il davos da fevrer 2025 e geraua Silvana Menzli ha entschiet niev ell'executiva da nossa vischnaunca cun igl 1. da mars 2025.

Il cussegl da vischnaunca elegia en votaziun unanima geraua Silvana Menzli en la cumissiun da biblioteca, en la cumissiun da cultura e sco delegada per la corporaziun da vischnauncas SanaSurselva.

Tractanda 5 **Nominaziun d'in delegau per la Corporaziun dallas vischnauncas concessiunarias dallas Ovras Electricas Reinanteriur SA**

A caschun dall'emprema radunonza da delegai dalla Corporaziun dallas vischnauncas concessiunarias dallas Ovras Electricas Reinanteriur SA (COORA) che ha giu liug ils 30 da schaner 2025 a Trun ei Dumeni Tomaschett vegnius elegius el cussegl d'administraziun dalla COORA. Tenor ils statuts dalla COORA han las vischnauncas concessiunarias plinavon il dretg sin in representant en la radunonza da delegai.

Il cussegl da vischnaunca elegia cun 12 : 0 vuschs gerau Martino Della Valle sco delegau per la Corporaziun dallas vischnauncas concessiunarias dallas Ovras Electricas Reinanteriur SA.

Tractanda 6 **Verificaziun dil resultat dalla votaziun communal dils 09-02-2025**

Cusseglhier Claudio Thalmann declara che la cumissiun per verificaziun da votaziuns hagi controllau ils resultats dalla votaziun communal dils 9 da fevrer 2025 ed anflau tut en uorden. En num dalla cumissiun propona Claudio Thalmann da verificar ils resultats publicai.

En votaziun unanima verifichescha il cussegl ils resultats publicai dalla votaziun communal dils 09-02-2025.

Tractanda 7

Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

Il president
Baseli Tomaschett

Per la suprastonza communal

Il president
Dumeni Tomaschett